

Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit inatsit pillugu Naalakkersuisut allannguutissamik siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaalilluni § 2 Inatsisartut inatsisaanni Kalaallit Nunaanni Inatsisartunut qinersisarneq pillugu inatsisip assinganik aalajangersagaqaleqqullugu.

(Inatsisartunut ilaasortaq Malik Berthelsen, Siumut)

Akissuteqaat

(Nunami Namminerimi Pissutsinut, Pinngortitamut Avatangiisinullu Naalakkersuisoq, Anthon Frederiksen)

Aappassaaneerpeqarnera

Inatsisartunut ilaasortap Malik Berthelsen, Siumut, kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu inatsisartut inatsisaata allanngortinneqarnissaanut Naalakkersuisut siunnersuummik saqqummiussaqaarnissaat pillugu Inatsisartut aalajangiiffigisassaattut siunnersuummik saqqummiussaanut, taamaalillutik kommunalbestyrelsinut qinersisussat Kalaallit Nunaata avataaniikkallartut Inatsisartunut qinersisarneq assigalugu assinganik pisinnaatitaaffeqalernissaanut siunnersuutaata Inatsisit Atortinneqarnerannut Ataatsimiititaliap suliarineranut qujavunga.

Naalakkersuisut maluginiarpaat Inatsisit Atortinneqarnerannut Ataatsimiititaliap isumaliutai kommunalbestyrelsinut, nunaqarfinnut ilagiit sinniisaannullu qinersisarnerit pillugit inatsisip allanngortinneqarnissaannut Malik Berthelsen-ip siunnersuutaa taamatut ilusaa naaportorlugu akuerineqassappat ajornartorsiutaasinnaasunik malitseqaarnissaanik kinguneqarsinnaanera.

Naalakkersuisut Inatsisit Atortinneqarnerannut Ataatsimiititaliap isumaliutai isumaqatigaat.

Naalakkersuisut maluginiarpaat kommunit pillugit qinersisarneri inatsisip allanngortinneqarnissaanik aalajangiisoqartinnagu misissugassat arlalippassuuneri. Assersuutigalugu taaneqassaaq sumiiffimmi sinniisuutitat atortinneqarneri kommuninut qinersisarneri inatsimmut ilanngunneqassanersoq, sumiiffinni sinniisuutitat atortinneqarnerisa kommunini suliaassarfiit aaqqissuuteqqinneqarnerat pillugu immikkut inatsimmi taamaallaat aalajangersarsimammat. Aalajangersagaq maannamut kommuninut qinersisarnerit pillugit inatsimmi ilaanngilaq.

Kultureqarnermut, Ilinniartitaanermut, Ilisimatusarnermut, Ilageeqaarnermullu Naalakkersuisoqarfiup tusarniaanermi akissummini oqaatigivaa, ”*Ilagiit sinniisaasa suliaasa pingaarnerit ilagivaat Kalaallit Nunaanni inuiaqatigiinni ilageeqarnerup siuarsarneqarnissaa, tamannalu suliaq naammassineqarsinnaanngilaq qinigaasoq nunatta avataani inissisimappat.*

Taamaattumik innersuussutigineqarsinnaanngilaq Inatsisartunut qinersisarnerit pillugit inatsimmi § 2 ilagiit sinniisaannut qinersisarnerni atuutsinneqartussaana.”

Soorlu siullermeerinermi oqaatigigipput, Naalakkersuisut inatsisartunut, kommunalbestyrelsinut, nunaqarfinni aqutsisunut ilagiillu sinniisaannut kiisalu Pituffimmi innuttaasut siunnersuisoqatigiivinut qinersisarnernut inatsisit tamakkerlugit misissorlugit nalilersorlugillu aallartereerpaat, tassanilu siunertaavoq naleqqussaasoqarnissaa nutarterisoqarlunilu, taamaaliornikkut qinersinermut inatsisit Namminersorlutik Oqartussat eqqunneqarnerisa kingorna pissutsinut naleqqussarneqassammata. Naalakkersuisut apeqqut Inatsisartunut ilaasortap Malik Berthelsenip saqqummiussaa ilisimavaat, tamannalu suliap ingerlateqqinnissaanut ilanngunneqarumaarpoq.

Inatsisartunut kommuninullu qinersisarnerit pillugit ataatsimoortumik inatsisissatut upernaakkut 2012-imi ataatsimiinnermi Naalakkersuisut siunnersuuteqarumaarput. Tamatuma pinnginnerani attuumassuteqartut soorunami tusarniaavigineqaqqaarumaarput.